

Samoan: Bible for Roma

Formatted for Translators

©2022 Wycliffe Associates

Released under a Creative Commons Attribution-ShareAlike 4.0 International License.

Bible Text: The English Unlocked Literal Bible (ULB)

©2017 Wycliffe Associates

Available at <https://bibleineverylanguage.org/translations>

The English Unlocked Literal Bible is based on the unfoldingWord® Literal Text, CC BY-SA 4.0. The original work of the unfoldingWord® Literal Text is available at <https://unfoldingword.bible/ult/>.

The ULB is licensed under the Creative Commons Attribution-ShareAlike 4.0 International License.

Notes: English ULB Translation Notes

©2017 Wycliffe Associates

Available at <https://bibleineverylanguage.org/translations>

The English ULB Translation Notes is based on the unfoldingWord translationNotes, under CC BY-SA 4.0. The original unfoldingWord work is available at <https://unfoldingword.bible/utn>.

The ULB Notes is licensed under the Creative Commons Attribution-ShareAlike 4.0 International License.

To view a copy of the CC BY-SA 4.0 license visit <http://creativecommons.org/licenses/by-sa/4.0/>

Below is a human-readable summary of (and not a substitute for) the license.

You are free to:

Share — copy and redistribute the material in any medium or format. Adapt — remix, transform, and build upon the material for any purpose, even commercially.

The licensor cannot revoke these freedoms as long as you follow the license terms.

Under the following conditions:

Attribution — You must attribute the work as follows: "Original work available at <https://BibleInEveryLanguage.org>."

Attribution statements in derivative works should not in any way suggest that we endorse you or your use of this work.

ShareAlike — If you remix, transform, or build upon the material, you must distribute your contributions under the same license as the original. No additional restrictions — You may not apply legal terms or technological measures that legally restrict others from doing anything the license permits.

Notices:

You do not have to comply with the license for elements of the material in the public domain or where your use is permitted by an applicable exception or limitation.

No warranties are given. The license may not give you all of the permissions necessary for your intended use. For example, other rights such as publicity, privacy, or moral rights may limit how you use the material.



Roma

1 ¹O a'u o Paulo, o le auauna a Iesu Keriso, ua vala'auina e fai ma aposetolo, ma ua filifilia mo le tala lelei a le Atua. ²Sa ia folafola mai anamua, e ala i ana perofeta i tusitusiga paia, ³e fa'ataatau i lona Atali'i e tupuga mai iā Tavita i la le tino. ⁴E ala i le Agaga paia; ua ia fa'ailoa ma le mana, o ia o le Atali'i o le Atua, ua toetu mai i le oti; o Iesu Keriso le Alii. ⁵O ia ua tatou maua ai le alofa tunoa ma le faiva o le aposetolo; e ala i le usiusitai i le fa'atuatua o atunu'u uma ona o lona suafa. ⁶O totonu o nei atunu'u, o oe ua vala'auina e Iesu Keriso. ⁷O i latou uma o i Roma, ua alofaina e le Atua ma ua vala'auina e fai ma tagata paia. Ia iai le alofa tunoa ma le filemu mai le Atua le Tamā ma le Alii o Iesu Keriso. ⁸E muamua ona ou fa'afetai i le Atua e ala ia Iesu Keriso mo outou uma, ona o lo outou fa'atuatua ua folafolaina atu i le lalolagi atoa. ⁹O le Atua o lo'u molimau, o ia ou te auauna i ai lo'u agaga, i le tala lelei o lona Atali'i, o lo'o ta'uta'u atu pea outou. ¹⁰Ou te fa'atoga atu i taimi uma i ou tatalo; ina ia ou manuia nei i le finagalo o le Atua, ina ia ou alu atu ia te outou. ¹¹Ua ou naunau e vaai ia te outou, ina ia ou avatu o meaalofo fa'aleagaga, ina ia mafai ona fa'amalosi ai outou. ¹²O lenei, ua ou naunau e fa'amalosi ia te outou, e ala i le faatuatua o le tasi i le tasi, o outou ma au foi. ¹³O lenei le au uso e, ou te lē loto ia outou lē iloa, ou te manatu soo oute alu atu ia te outou (a 'ua taofia a'u e o'o mai i le aso nei), 'ina 'ia 'ou fua mai fo'i 'iā te 'outou, fa'apei 'ona 'ou maua i isi nu'u 'ese. ¹⁴O au o se tagata nofo aitalafu i Eleni ma tagata ese, o e popoto ma e valea. ¹⁵O lenei, ua ou sauni e talai le tala lelei ia te outou o i Roma. ¹⁶Auā ou te lē ma i le tala lelei, auā o le mana o le Atua e fa'aola ai tagata uma o ē talitonu, e muamua i tagata Iutaia ma Eleni. ¹⁷Auā o le amiotonu o le Atua ua fa'alia mai i le fa'atuatua i le fa'atuatua, e pei ona tusia, "O e amiotonu e ola i le fa'atuatua". ¹⁸Auā o le toasā o le Atua ua fa'aali mai le lagi i e lē amio atua ma e amioletonu, ma tagata amioletonu ua taofi le mea moni. O mea ua iloa i le Atua ua fa'ailoa atu ia te i latou. ¹⁹Auā ua fa'amalamalamaina i latou e le Atua. ²⁰Talu ona faia o le lalolagi, o ona uiga lē vaaia; o lona mana lea e fa'avavau ma lona natura paia, ua manino lava i le vaai, ua iloaitino i mea na ia faia. E leai la se alofaga o ia mea ia te i latou. ²¹Auā e ui lava na latou iloa le Atua, ua latou lē vivi'i i le Atua, pe fa'afetai atu foi ia te ia. Ae peitai, ua latou valea i o latou manatu ma ua fa'apogisaina o latou loto valea. ²²Ua latou fai mai e popoto, ae ua avea i latou ma e valelea. ²³Ua latou fesui'ai foi le mamalu o le Atua soifua pea ma le fa'atua o le tagata e fano, ma manu felelei, ma manu vae fa ma mea fetolofi. ²⁴O le mea lea ua tu'uina atu ai i latou e le Atua i tuinanau o latou loto leaga, latou te fa'aleagaina i o latou lava tino. ²⁵O i latou lava ua fesui'ai le upu moni o le Atua i le pepelo, o e ua tapuai ma auauna i mea na faia, nai lo'o o Ia na faia, ia vi'ia e fa'avavau. Amene. ²⁶O le mea lea ua tuuina ai e le Atua latou e fa'aleagaina i tuinanau, auā ua fesui'ai e o latou fafine le so'otaga e tatau ma le tu e lē masani ai. ²⁷E fa'apea foi ona tu'ua e le tane le so'otaga ma fafine, ae ua tuinanau atu i le tasi i le tasi. O ia tane ua faia amioga māsiasi ma maua i latou le fa'asalaga e tatau mo mea sesē ua latou faia. ²⁸Ua latou le talia le iai o le Atua i lo latou iloa, ua ia tuuina atu i latou i le mafaufau leaga, ina ia latou faia mea e lē tatau. ²⁹Ua fa'atumuina i latou i le amioletonu, ma le amio leaga, ma le matape'ape'a ma le loto leaga. Ua tumu i latou i le matau'a, ma le fasioti tagata, ma le misa, ma le tafa'asese ma le fa'amoemoe leaga. O le faitala lava i latou, ³⁰ma le ta'uga fa'aleaga, ma le inoino i le Atua, ma le ita, ma le fa'amaualuga, ma le mitamita, ma le faufau ala e fai ai lē leaga; latou te lē usiusitai i matua. ³¹O i latou e fa'avalea, ma le lē fa'atuatua, ma le leai o se loto, ma le leai o se alofa. ³²Ua latou malamalama i poloa'iga a le Atua, o i latou e faia mea fa'apena e tatau ona oti. Ae e lē gata ina latou faia nei mea, ae ua latou talia foi o isi o loo faia nei mea.

2 ¹O le mea lea, e leai sou alofaga, oe le tagata e faamasino, aua o mea e te faamasinoina ai le isi tagata, e te faasalaina oe lava. Auā o outou o ē faamasino, ua faia lava ia mea. ²Ae peitai ua tatou iloa o le faamasinoga a le Atua e tusa ma le upu moni pe a oo mai i luga o ē fai mea fa'apenā. ³Ae mafaufau i le mea lenei, oe le tagata o lo'o faamasinoina i latou o loo faia ia mea e ui lava e te faia ia lava mea. E te sao mai ea i le faamasinoga a le Atua? ⁴Pe e te manatu faatauva'a ea i le tamaoaiga o lona agalelei, ma lona faasalaga tuai, ma lona onosai? E te le iloa ea o lona agalelei e ta'ita'ia ai oe i le salamo? Ae o le maaa tele o lou loto ma lou lē salamō ua e faaputuina lava mo oe le toasā i le aso o le to'asā, o le aso lea e faaalai ai le faamasinoga tonu a le Atua. ⁶E tau'i atu foi e ia i tagata taitoatasi e tusa ma lana amio; ⁷o ē ua tumau pea i galuega lelei, ua latou saili ai le viiga, ma le mamalu ma le le iu vale. ⁸Ae peitai o i latou o ē sailia i latou lava, o ē lē usiusitai i le upu moni, ae usiusitai i le amioletonu, e oo mai lava le toasā tele. ⁹E faaoo mai fo'i e le Atua le puapuga i tagata taitoatasi uma o ē amio leaga, e muamua i le Iutaia, atoa ma le Eleni. ¹⁰Ae o le viiga, ma le mamalu, ma le filemu o le a oo mai ia i latou uma o e faia mea lelei, e muamua i le Iutaia, atoa ma le Eleni. ¹¹Auā e lē faailoga tagata le Atua. ¹²Auā o i latou uma o ē na agasala e aunoa ma le tulafono, e fano foi i latou e aunoa ma le tulafono; ma o i latou uma o e ua agasala i le tulafono e faamasinoina/faasalaina i latou i le tulafono. ¹³Auā e lē o ē faalogologo i le tulafono e amiotonu i luma o le Atua, a o ē e anaana i le tulafono e tauamiotonuina. ¹⁴Auā pe a fai fua e Nu'u ese o ē e lē o i ai le tulafono o mea e tusa ma le tulafono, e ui ina le o i ai le tulafono, ua avea i latou ma tulafono ia te i latou. ¹⁵E ala i lenei mea ua latou faaalai ai o gaoioiga e manaomia e le tulafono ua tusia i o latou loto. O loo molimau foi o latou loto fuatia ifo ia te i latou, ma o latou lava manatu e molia pe faasalaina i latou, ¹⁶i le aso e faamasinoina ai e le Atua mea lilo a tagata uma, e tusa ma la'u tala lelei, e ala ia Iesu Keriso. ¹⁷Ae afai e te fai atu o oe o le Iutaia ma ua e fa'alagolago i le tulafono ma mitamita i le Atua, ¹⁸ma ia iloa lona finagalo ma talia le mea e sili ona lelei, auā ua aoaoina oe i le tulafono; ¹⁹afai foi ua e mautinoa o oe o le taitai o ē tauaso, o le malamalama foi i ē o i le pouliuli, ²⁰o le aoao i ē valea, o le aoao o tamaiti, ma ua ia te oe i le tulafono le tino o le poto ma le upumoni, e faapefea la ona aafia ai lou olaga? ²¹O oe o lē ua aoao atu i isi, e te lē aoao ea ia te oe lava? O oe o lē e talai atu i le gaioi, e te gaioi ea? ²²O oe o lē fai mai e lē tatau ona e mulilua, e te mulilua ea? O outou o ē inoino i tupua, ua e faoa ea malumalu? ²³O oe o lē mitamita i le tulafono, ua e faaleagaina ea le Atua i lou soli o le tulafono? ²⁴Auā ua

upuleagaina le suafa o le Atua i Nuu ese ona o outou, e pei ona tusia.²⁵ Auā o le peritome e aogā ia te oe pe afai e te usiusitai i le tulafono; ae afai e te soli i le tulafono, ua avea ai lou peritome ma faaleperitomeina.²⁶ O lenei, afai e tausia e le tagata e lei peritomeina le tulafono, e lē taua ea lona lē peritomeina o le peritomeina?²⁷ E lē faasalaina ea oe e lē ua lē peritomeina, pe afai na te tausia le tulafono? Auā ua ia te outou le tulafono tusitusia ma le peritome, a ua e soli le tulafono!²⁸ Auā e lē o ia o se Iutaia e na o le tino; e lē o le peritome foi ua na o le mea i fafo i le tino.²⁹ A o le tagata Iutaia i le loto, o le peritome o le loto lea, i le Agaga, ae lē o le tusi. O le viiga o se tagata faapena e lē mai tagata ae mai le Atua.

3¹ O lenei, o le a ea se mea e sili ai le Iutaia? Ao le a foi le aoga o le peritomeina?² E lelei i mea uma. Na muamua ona tuuina atu le faaliga iai latou e le Atua.³ A faapefea pe ana leai se faatuatua i nisi o Iutaia? O le ā avea ea lo latou lē faatuatua e faaleaogaina ai le faamaoni o le Atua?⁴ Ia aua nei faapea. Ae peitai, ia tuu le faamaoni i le Atua, e ui ina pepelo tagata uma lava. E pei ona tusia, 'Ina ia tau amiotonuina oe i au afioga, ma ia e manumalo pe a faamasinoina oe.'⁵ Ae afai e faaalitoina le amiotonu a le Atua i la tatou amioletonu, o le a sa tatou upu e fai? E mafai ea ona tatou faapea ane, ua amioletonu ea le Atua, ua na te tuuina mai ai lona toasa iai tatou? (O upu a tagata ou te fai atu nei.)⁶ E le mafai lava! E faapefea ona faamasinoina le lalolagi e le Atua?⁷ Aisea e faamasinoina ai au ua pei o sē ua agasala, pe afai e faateleina le faamaoni o le Atua ma tupu ai lona viiga ona o lo'u pepelo? Aisea e le faapea ane ai, e pei ona upuleagaina i matou, e pei ona talitonu nisi ua matou fai atu ai, ua faapea la matou upu, "Ia tatou faia mea leaga, ina ia tupu ai mea lelei"? E tonu la latou sala/faasalaga.⁸ O lenei, pe faapefea? O tatou alofaga ea tatou iai tatou? E leai lava. Aua ua uma ona matou molia o Iutaia ma Eleni, o i latou uma lava, o loo nofo sala or o loo nofo sala i latou uma lava.¹⁰ Ua faapei ona tusia; "E leai lava sē amiotonu, e leai lava se tasi;¹¹ e leai se na te malamalama/lagona, e leai lava sē e saili i le Atua."¹² Ua liliu ese uma lava; ua leaga faatasi i latou. E leai sē ua amio lelei, ua leai, ua leai lava se tasi.¹³ Ua se tuugamau le faamaga o latou faai. Ua oleole o latou laulaufaiva. O i o latou laugutu le mea oona o le asipi/or 'ona o le gata.¹⁴ Ua tumu o latou gutu i le fetuu ma le upu faafiufiu/ona.¹⁵ Ua tele vavave o latou vae e sasaa ai le toto.¹⁶ O i o latou ala le olopalaina ma le puapugatia.¹⁷ E leiloa e nei tagata ala o le filemu/manuia.¹⁸ E leai lava so latou matau i le Atua or Latou te le matatau i le Atua.¹⁹ O lenei, ua tatou iloa, o mea uma ua fai mai e le tulafono, ua fai mai lava i e ua i lalo o le tulafono, ina ia punitia ai gutu uma lava, ma ia nofo sala le lalolagi uma i luma o le Atua/or ma ia tali atu le lalolagi uma i le Atua.²⁰ Aua e le tauamiotonuina se tagata e toatasi i ona luma i galuega o le tulafono. Aua o le tulafono e iloa lelei ai le agasala.²¹ A o lenei, ua faaalina mai le amiotonu a le Atua, e le o i ai le tulafono, ua molimau iai e le tulafono atoa ma le au perofeta;²² ao le amiotonu lea a le Atua i le faatuatua ia Iesu Keriso, mo i latou uma e faatuatua ia te ia. Aua e leai se eseese/or e le eseese lava.²³ aua ua agasala tagata uma lava ma ua le oo i le mamalu o le Atua,²⁴ ua tauamiotonuina fua i lona alofa tunoa i le togiola e a Keriso Iesu.²⁵ Na auina mai e le Atua Iesu Keriso, o le taulaga mo agasala i lona toto, e maua i le faatuatua. Na ia faaalitoina mai lana amiotonu ile le tauia o agasala ua mavae,²⁶ i le faapalepale o le Atua. Na ia faaalitoina mai foi lana amiotonu i ona po nei, ina ia iloa ai o ia o le amiotonu, ma ua tauamiotonuina e ia lē ua faatuatua ia Iesu.²⁷ O lenei, o fea le mitamita? Ua vaoia. O a ni tulafono e ala mai ai? or I se fea tulafono? E leai, e tauala mai i le tulafono o le faatuatua or O le tulafono i le faatuatua.²⁸ O lenei, ua tatou taofi, e tauamiotonuina le tagata i le faatuatua, e le o iai galuega o le tulafono.²⁹ Poo le Atua ea na o le Atua o Iutaia? E le o ia foi o le Atua o Nuū ese? Ioe, e faapena foi ma Nuū ese.³⁰ Aua foi ole Atua e tasi lava na te tauamiotonuina i le faatuatua le ua peritomeina atoa ma le ua le peritomeina, ua i ai le faatuatua.³¹ O lenei, e faaleaoga ea e i tatou le tulafono i le faatuatua? Aua nei faapea! Ae peitai, ia tatou faatumauiina le tulafono.

4¹ O lenei, pe se a sa tatou upu i mea na maua i ia le tino e lo tatou tamā o Aperaamo?² Auā ana tauamiotonuina Aperaamo i galuega, po ua ia te ia se mea e mitamita ai; a ua leai i luma o le Atua.³ E fai mai e a le Tusi? "Na talitonu/ faatuatua Aperaamo i le Atua, ona ta'ua ai le o ia e fai ma amiotonu."⁴ A o le totogi o lē faigaluega, e le ta'ua lona totogi o se meaalofo, ao le mea ua nono.⁵ Ae mo lē e lē faigaluega ae e faatuatua i lē na te tauamiotonuina lē ua faalemata'u, ua ta'ua lona faatuatua o le amiotonu.⁶ E faapei ona faaamua e Tavita o le tagata ua ta'ua i ai e le Atua le amiotonu e aunoa ma galuega.⁷ Na ia fai atu, "Amuia i latou ua faamagaloina a latou agasala, ma ua ufitia a latou agasala.⁸ Amuia foi le tagata e le tausalaina o ia e le Alii.⁹ O lenei, pe gata ea i le ua peritomeina lenei faamanuiaga? E le oo foi ea i le ua le peritomeina? Aua ua faapea i tatou, Ua ta'ua le faatuatua o Aperaamo o le amiotonu."¹⁰ Na faapefea ona ta'ua ia te ia? Pe a o lei peritomeina o ia poo mulimuli ane? E lei ta'ua ina ua peritomeina ae ua ta'ua ina ua le peritomeina.¹¹ Na maua e Aperaamo le faailoga o le peritomeina o le faailoga o le amiotonu ona o lona faatuatua ae lei peritomeina o ia. O le mafuaaga ina ia avea o ia ma tamā o i latou uma ua talitonu/faatuatua ae lei peritomeina i latou, ina tau amiotonuina i latou.¹² O ia foi o le tamā o se peritomeina ma i latou e lei peritomeina ae peitai o e ua savavali i tulagavae o le faatuatua o lo tatou tamā o Aperaamo ao lei peritomeina o ia.¹³ Aua e lei folafolaina atu ia Aperaamo, poo lana fanau, e fai mona tofi le lalolagi e le mai le tulafono, a e maua i le amiotonu ua i le faatuatua.¹⁴ Auā pe afai ua tofia e ua i le tulafono e fai ma sulii, ua faaleaogaina ai le faatuatua ma ua le aoga le folafolaga.¹⁵ O le tulafono na te aumaia le ita, ae a leai se tulafono, ua leai se solitulafono.¹⁶ O le mea lea e maua ai i le faatuatua le mea na folafolaina, ina ia maua i le alofa tunoa; ina ia tumau lea i sulii o Aperaamo - e le tuli i le ua i le tulafono, a e oo i le ua i le faatuatua o Aperaamo. O le tamā o ia o i tatou uma lava,¹⁷ e pei ona tusia, "Ua ou tofia oe e fai ma tamā o nuu e tele." Na iai Aperaamo i ona luma, o lea na ia faatuatua i ai, o ia lava o le Atua, na faaola ia o e ua oti, ma lē na te valaauina mea ua leai, peseai ua i ai.¹⁸ Na ia faatuatua ma le faamoemoe, a ua leai se mea e faamoemoe ai, ina ia avea o ia ma tamā o nuu e tele, pei ona fetalai mai, "E faapea lava lau fanau."¹⁹ E lei vaivai foi lona faatuatua, e lei manatu foi i lona tino ua oti, (aua ua selau tausaga o lona matua/soifua) ma ua oti foi le manava/tagatafanau o Sara.²⁰ E lei masalo vale foi ia ma le le faatuatua i le mea na folafolaina e le

Atua. Ae peitai, ua faamalositia/ua tele lona faatuatua ma ua vivii atu i le Atua. ²¹Ua na mautinoa foi, e mafai ia te ia ona faia o le mea na folafolaina e le Atua. ²²O lea foi ua "ta'ua ai lona faatuatua o le amiotonu. ²³Ao upu, e lei tusia ona o ia lava, Ua ta'ua ia te ia. ²⁴Na tusia foi ona o i tatou peitai ona o i tatou foi o le a ta'ua i ai o i tatou o e faatuataua i le na faatu mai i lo tatou Alii o Iesu nai e ua ua oti. ²⁵Na tuuina mai o ia ona o a tatou agasala ma toe faatuina mai ina ia ta'uamitonuina ai i tatou.

5 ¹Talu ai ua tauamitonuina i tatou i le faatuatua, ua tatou maua le filemu ma le Atua e ala i lo tatou Alii o Iesu Keriso. ²O ia foi ua tatou maua ai lo tatou ala i le faatuatua i lenei alofa tunoa ua tatou tutu ai, ma tatou mitamita ai i le faamoemoe i le mamalu o le Atua. ³E lē gata i lea, a ua tatou mitamita foi i o tatou puapuaga. ⁴Ua tatou iloa o puapuaga e aumaia ai le onosai. O le onosai e tupu ai le amio lelei, o le amio foi e tupu ai le faamoemoe, ⁵ma le faamoemoe e le maasiasi ai, auā ua sasaa mai le alofa o le Atua i o tatou loto e le Agaga Paia, o le na foaiina mai ia i tatou. ⁶Auā a o tatou vaivai, na maluu Keriso i le taimi tatau mo ē faalemata. ⁷Auā e faigata ona oti se tasi mo le tagata amiotonu, e ui lava e mafai e se tasi ona lototele e oti mo se tagata lelei. ⁸A ua faamaonia mai e le Atua lona lava alofa ia te i tatou, auā na maluu Keriso mo i tatou a o tatou agasala pea. ⁹O lenei, e sili atu ona tauamitonuina i tatou i lona toto, ona faaolaina ai lea o i tatou e ia i le toasa o le Atua. ¹⁰Auā afai ua lelei i tatou ma le Atua i le maluu o lona Alo, ina o fai i tatou mona fili, e sili ona faaolaina i tatou i lona soifua, o i tatou ua lelei ma ia. ¹¹E lē gata i lea, a ua tatou olioli foi i le Atua i lo tatou Alii o Iesu Keriso, o lē ua tatou maua ai nei lenei lelei. ¹²O lenei, faapei ona oo mai o le agasala i le lalolagi ona o le tagata e toatasi, ua faapea foi ona oo mai o le oti ona o le agasala. ¹³Ua oo foi le oti i tagata uma, auā ua agasala uma lava. Auā sa i le lalolagi le agasala seia oo i le tulafono, ae lē taulia le agasala pe a leai se tulafono. ¹⁴E ui i lea, na pule le oti talu mai iā Atamu seia oo mai iā Mose, e oo lava i ē na lē agasala e pei o le lē usiusitai o Atamu, o le faaaoaoga lea o lē o le a afio mai. ¹⁵A o le meaalofo e lē pei o le solitulafono. Auā afai ua oti le toatele i le agasala a le toatasi, e lē sili ea le alofa tunoa o le Atua ma le meaalofo i le alofa tunoa o le tagata e toatasi, o Iesu Keriso, ua faateleina i tagata e toatele! ¹⁶Auā e lē tusa le mea alofa ma le iuga o le agasala a le tagata e toatasi. O le faamasinoga na mulimuli mai i le solitulafono e tasi ma oo mai ai le ta'usalaina/faasala, ae o le meaalofo na mulimuli mai i le tele o solitulafono ma aumaia ai le tauamitonuina. ¹⁷Aua afai na pule le oti i le agasala a le toatasi, e lē sili ea le pule i le ola o ē ua maua le tele o le alofa tunoa ma le meaalofo o le amiotonu ona o le toatasi, o Iesu Keriso lea. ¹⁸O lenei, e pei ona ta'usalaina o tagata uma lava i le agasala e tasi, e faapea foi ona tau amiotonuina ma le ola tagata uma i le amiotonu e tasi. ¹⁹Auā faapei ona avea ma agasala le toatele i le lē usiusitai o le tagata e toatasi, e faapea foi ona tau amiotonuina o le toatele i le usiusitai o le toatasi. ²⁰Ae na oo mai le tulafono ina ia faateleina ai le solitulafono. Ae o le mea na tupu tele ai le agasala, sa faateleina ai le alofa tunoa. ²¹O lenei, e pei ona malo o le agasala e oo i le oti, e fa'apea foi ona malo o le alofa tunoa i le amiotonu e oo i le ola e fa'avavau, ia Iesu Keriso lo tatou Ali'i.

6 ¹O le ā la se mea tatou te fai atu ai? E tatau ea ona tatou faaauu pea i le agasala ina ia faateleina ai le alofa tunoa? ²Tau ina ia aua lava ne'i tupu. O i tatou o ē ua oti i le agasala, e fa'apefea ona tatou ola ai pea? ³Ua outou lē iloa ea, o i latou uma na papatisoina iā Keriso Iesu, na papatisoina i latou i lona maluu? ⁴O lenei ua tatanu fa'atasi o tatou ma ia i le papatisoga i lona maluu. E pei ona toe fa'atūina mai o Keriso nai ē 'ua oti i le mamalu o le Tamā, e fa'apea fo'i ona tatou sāvavali i le ola fou. ⁵Auā afai ua faatasia i tatou ma ia i le fa'atusa o lona maluu, e fa'apena foi i tatou i lona toetū mai. ⁶Ua tatou iloa lenei mea, na faasatauroina faatasi ma ia lo tatou tagata tuai, ina ia faaumatia ai le tino o le agasala. Ua tupu lenei mea ina ia lē toe faapologaina i tatou i le agasala. ⁷O lē ua oti ua ta'umamitonuina o ia i le agasala. ⁸Afai foi ua oti faatasi i tatou ma Keriso, ua tatou taofi, tatou te ola foi faatasi ma ia. ⁹Ua tatou iloa ua toe tu mai Keriso nai e ua oti, e le toe maluu lava o ia, e le toe pule le oti ia te ia. ¹⁰Auā o lona maluu, ua tasi lona maluu ona o le agasala mo tagata uma. Ae peita'i, o le olaga o loo soifua ai o ia, e soifua lava ia mo le Atua. ¹¹Ia faapea foi la outou taofi, ua outou oti i le agasala, a ua outou ola mo le Atua iā Keriso Iesu. ¹²O lenei, aua nei pule le agasala i o outou tino aua vale, ina ia outou gauai/usiusitai ai i ona tuinanau. ¹³Aua nei tuuina atu itūtino o outou tino i le agasala, e fai ma mea faigaluega e fai ai le amioletonu. A ia tuuina atu outou i le Atua, e pei o ē ua fa'atūina mai le oti i le ola, ma tu'u atu i le Atua o outou tino e fai ma mea faigaluega e fa'atatau i le amiotonu. ¹⁴Aua ne'i faatagaina le agasala e pule iā te outou. Auā ua outou lē i lalo o le tulafono, a o le alofa tunoa. ¹⁵O lenei, pe faapefea? Pe ua tatou agasala ea ina ua tatou lē nonofo i le tulafono, a o le alofa tunoa? Talosia ia, aua lava nei faapea. ¹⁶Tou te lē iloa ea, afai tou te tu'uina atu outou e fai ma pologa, o le auauna outou i lē ua outou usiusitai i ai? O outou o pologa a le agasala, e oo atu i le oti, po o pologa i le usiusitai, e oo atu i le amiotonu. ¹⁷A ia faafetai i le Atua! Auā sa fai outou ma pologa a le agasala, a ua outou usiusitai ma le loto i le aoaoga na tuuina atu iā te outou. ¹⁸Ua faasaolotoina outou mai le agasala, ma ua avea outou ma pologa a le amiotonu. ¹⁹Ou te tautala i upu a tagata ona o le vaivai o outou tino. Auā e pei ona outou tuuina atu o outou tino e fai ma auauna i le amio leaga ma le solitulafono, e iu ai outou i le tele o le solitulafono, e fa'apea foi ona tuuina atu nei o outou tino e fai ma pologa i le amiotonu e faapaia ai. ²⁰Auā sa aunoa outou ma le amiotonu, ina o auauna outou i le agasala. ²¹O le ā foi le fua na outou maua i na aso, o mea ua outou māsiasi ai nei? Auā o le iuga o na mea o le oti. ²²Ae o lenei ua faasaolotoina outou mai le agasala ma ua fai ma auauna a le Atua, ua ia te outou o outou fua mo le faapaia. O le taunuuga o le ola e faavavau. ²³Auā o le totogi o le agasala o le oti lea; ao le ola e faavavau, o le mea faifuaia mai lea e le Atua, i lo tatou Alii o Keriso Iesu

7 ¹Pe tou te le iloa ea, le au uso e, (auā ou te tautala atu i tagata ua iloa le tulafono), e pule le tulafono i le tagata i aso uma e ola ai?²Auā o le fafine faaipoipo ua noatia i le tulafono i le tane a o ola o ia; ae afai ua oti lana tane, ona talaina lea o ia mai le tulafono o le faaipoipoga. ³O lenei, a o ola pea lana tane, ae afai e nonofo o ia ma se tasi tane, e ta'ua o ia o le mulilua. Ae afai e oti lana tane, ua saoloto o ia mai le tulafono, e lē mulilua foi o ia pe a nonofo ma se isi tane.⁴O le mea lea, o'u uso e, ua oti foi outou i le tulafono i le tino o Keriso. Ua faapea foi ona outou faatasi ma le tasi, o lē na toe faatūina mai i ē ua oti, ina ia tatou fuaina mai ni fua i le Atua. ⁵Auā a o tatou i ai i le tino, o tuinanauga o le agasala, na faagaeina e le tulafono, sa galue i totonu o o tatou tino, e fua mai ai ni fua e oti ai.⁶Ae o lenei, ua tatalaina mai i tatou mai le tulafono. Ua tatou oti i le mea na saisaitia ai i tatou. O le mea lea ina ia tatou auauna ai i le fou o le Agaga, ae lē o le tusi tuai.⁷O le ā la sa tatou tala e fai atu? O le tulafono ea o le agasala? Aua nei faapea lava. Ae peitai, ou te lē iloa lava le agasala, pe ana leai le tulafono. Auā ou te lē iloa le matapeapea sei vagana ua fai mai le tulafono, “Aua e te manao/tuinanau.” ⁸Ae na maua e le agasala le avanoa e ala atu ai i le poloaiga, ma ua tupu ai le tuinanau esese ia te a'u. Auā ana le aunoa ma le tulafono, na mate ai le agasala./ Aua ua oti le agasala, a o leai se tulafono.⁹Sa ou ola muamua e aunoa ma le tulafono, ae ina ua oo mai le poloaiga, ona toe ola mai ai lea o le agasala, ¹⁰ona ou oti ai lea. O le poloaiga e aumaia ai le ola, ua oo mai ai le oti ia te a'u.¹¹Auā na maua e le agasala le avanoa e ala i le poloaiga ma ou faasesēina ai. Na fasiotia a'u e ala mai i le poloaiga. ¹²E paia fo'i le tulafono, e paia foi le poloaiga, e tonu ma lelei. ¹³Pe na avea ea le mea lelei ma oti iā te a'u? Ia aua lava ne'i tupu lenei mea. Ae peitai o le agasala, ina ia faaalai o le agasala, ua oo mai ai le oti ia te a'u i le mea lelei, ma o le poloaiga e mafai ai ona avea le agasala ma agasala e le mafaitaulia. ¹⁴Auā ua tatou iloa o le tulafono e fa'aleagaga, a o a'u ou te i le tino. Ua faatauina a'u i le nofo pologa i le agasala.¹⁵Auā o mea ou te faia, ou te le malamalama lelei ai. Auā o le mea ou te loto i ai, ou te lē faia lava, o le mea foi ou te inoino i ai, ou te faia lava. ¹⁶Ae afai ou te faia le mea ou te le loto i ai, ou te ioe/malilie faatasi/ma te 'au upu faatasi ma le tulafono, e lelei le tulafono.¹⁷A o lenei, e lē o a'u e toe faia lea mea, a o le agasala o lo'o nofo i totonu ia te a'u. ¹⁸Auā ua ou iloa, o lo'o i totonu ia te a'u, o lo'o i lo'u tino, e lē o ola ai se mea lelei. Auā ua ou loto atu /manao atu mo le lelei, ae lē mafai ona ou faia.¹⁹Auā ou te loto i le lelei, ae peitai ou te lē faia, ae ou o le mea leaga ua ou loto i ai, ou te faia lava. ²⁰O lenei, afai ou te faia le mea ou te lē loto i ai, e lē o a'u ua toe faia, a o le agasala o lo'o nofo i totonu ia te a'u. ²¹O lenei, ua ou maua le tulafono lenei: Afai ou te mana'o e fai le lelei, ua ia te a'u le leaga. ²²Auā ou te olioli i le tulafono a le Atua faatasi ma lo'u tagata i totonu. ²³A ua ese le tulafono ua ou iloa i itutino o lo'u tino. E tau faasaga i le tulafono fou i lo'u mafaufau. E ave a'u faatagataotauaina i le tulafono a le agasala o loo i totonu o itutino o lo'u tino.²⁴Aue, o a'u o se tagata pagatia! O ai na te laveaiina a'u mai lenei tino o lenei oti? ²⁵A ia faafetai i le Atua ona o Iesu Keriso lo tatou Alii! O lenei, o a'u lava, ua ou auauna i le tulafono a le Atua ma lo'u mafaufau. Peita'i, ou te auauna i lo'u tino i le tulafono a le agasala.

8

¹O lenei, e leai se faasala i e o ia Keriso Iesu. ²Aua o le tulafono a le Agaga, o le ola ia Keriso Iesu ua faasaolotoina ai oe mai le tulafono ole agasala ma le oti.³O le mea na le mafaia i le tulafono, ina ua vaivai ia ona o le tino, na faia e le Atua. Na ia auina mai lona lava Alo, ua tino mai e pei o tagata agasala, o le taulaga foi mo agasala, na ia faasalaina ai le agasala i le tino. ⁴Na ia faia lea mea ina ia atoatoa ai le amiotonu o le tulafono ia i tatou, ae tatou savavali e lē tusa i la le tino, ae i la le Agaga. ⁵Ao latou e ola i le tino e loto atu i latou i mea a le tino, a o e i la le Agaga, e loto atu i mea a le Agaga.⁶Aua o le loto i la le tino o le oti lea; a o le loto i la le Agaga o le ola lea ma le filemu/manuia. ⁷O le loto i la le tino o le ita lea i le Atua, auā e le usiusitai i le tulafono a le Atua, e le mafai foi i ai. ⁸O i latou foi i la le tino, e le mafai ona fiasia i ai le Atua.⁹A o outou, tou te le i la le tino a e i la le Agaga, pe afai e nofo le Agaga o le Atua i totonu ia te outou. Ae afai ua le i ai le Agaga o le Keriso i se tasi, e lē fai ia mona. ¹⁰Afai ua i totonu ia te oe Keriso, ua oti le tino ona o le agasala, ae o loo ola le agaga ona o le amiotonu.¹¹Ae afai ua nofo i totonu o ia le Agaga na faatuina mai Iesu mai le oti, o le ā faaolaina outou tino augavale e lona Agaga, o loo nofo i totonu ia te outou.¹²O lenei, le au uso e, o tatou o tagata nofo aitalafu, a e le o i le tino ina ia tatou ola i la le tino. ¹³Afai tou te ola e tusa ma le tino, e oti ai outou, ae afai e ola i la le Agaga e fasiotia amioga a outou tino, tou te ola ai.¹⁴E toatele e taitaiina e le Agaga o le Atua, o atalii i latou o le Atua. ¹⁵Auā ua outou le maua le agaga o le pologa ina ia toe fefe ai; ae ua outou maua le Agaga o tamafai, tou te valaau atu ai, "Ava, le Tamā e!"¹⁶O loo molimau mai lava le Agaga i o tatou agaga, o fanau i tatou a le Atua. ¹⁷Ae afai o tatou o fanau, ua avea foi i tatou ma sulii, o sulii o le Atua. O sulii faatasi i tatou ma Keriso, pe afai tatou te tiga faatasi ma ia, ina ia faamanuiaina foi i tatou faatasi ma ia.¹⁸Aua o lo'u manatu e le tataua ona faatusaina le tiga i nei ona po ma le manuia atali e faaalai mai ia te i tatou. ¹⁹Auā o loo faatalitali mea uma na faia ma le naunau i le faaalai mai o atalii o le Atua.²⁰Aua ua faatoilaloina mea uma na faia i le iu vale, e le o lona finagalo lea, ae peitai ona o ia na faatoilaloina ai, i le faamoemoe ²¹ia tuusaunoa ia lava mea na faia ia le faapologaina e le iu vale, a e oo i le saolotoga o le fanau a le Atua e manuia ai. ²²Aua ua tatou iloa, ua oi faatasi ma oono faatasi mea uma lava na faia ua oo mai lava i ona po nei.²³E le gata foi i lea, a o i tatou lava ua i ai mea faapolopolo a le Agaga, tatou te feoi, o i tatou lava i totonu ia te i tatou, o loo faatalitali atu ia avea ma tamafai, o le faaolaina lea o tatou tino. ²⁴Auā e faaolaina i tatou i le faamoemoe. Ae o le faamoemoe ua vaaia e lē o le faamoemoe. Auā pe faapefea ona toe faamoemoe se tasi i le mea ua vaaia? ²⁵A e peitai a tatou faamoemoe i le mea ua le vaaia, tatou te faatalitali iai ma le onosai.²⁶E faapea foi le Agaga ona fesoasoani mai i lo tatou vaivai. Auā tatou te leiloa mea tatou te ole atu ai ma le tusa, a e peitai o le Agaga e fautua o ia mo i tatou, i le oi e le mafai ona talatalaina. ²⁷A o lē suesue i loto ua silafia e ia le finagalo o le Agaga, auā o loo fautua o ia mo le au paia a le Atua e tusa ma le finagalo o le Atua.²⁸Ua tatou iloa foi, e galue le Atua i mea uma lava mo le lelei faatasi ma i latou o e ua alolofa atu ia te ia, o e ua valaauina i lona finagalo. ²⁹Auā o e na silafia e

ia anamua, na ia tofia anamua foi, ia foliga i latou i lona Alo, ina ia avea o ia ma ulumatua o le au uso e toatele.³⁰ O e na tofia anamua e ia, ua valaauina foi i latou e ia; o e ua valaauina foi i latou e ia; o e ua ta'uamitonuina e ia, ua faamanuiaina foi i latou e ia.³¹ O lenei, se a sa tatou upu i nei mea? Afai ua 'au le Atua ma i tatou, o ai se e faasaga tau mai iai tatou? ³²O ia lava sa na le faasaoina lona lava Alo, a ua tuuina mai o ia ona o i tatou uma lava, e le foai fua e ia ia te i tatou mea uma lava faatasi ma ia i se a? ³³O ai se na te molia le au filifilia a le Atua? O le Atua o lē tau amiotonuina mai. ³⁴O ai se na te faasalaina mai? O Keriso Iesu o lē na malie-e sili atu ma lena, na toetu mai o ia- o loo i le itu taumatau foi ole Atua, o loo fautua foi o ia mo i tatou. ³⁵O ai se na te faateaeeseina mai i tatou i le alofa o Keriso/ O le puapuaga ea, poo le atuatuva'e, poo le saua, poo le oge, poo le lē lavalavā, poo le pagatia, poo le pelu? ³⁶Faapei ona tusia, "Ona o oe ua fasiotia ai i matou i aso uma, ua faatatauina i matou e pei o mamoe ā fasia."³⁷ A ua tatou manumalo aiai i nei mea uma lava, ona o ia ua alofa mai ia te i tatou. ³⁸Auā ua ou mautinoa e le mafaia e le oti, po o le ola, po o agelu, po o malō/alii, po o e malolosi, po o mea i nei ona po, po o mea atali, ³⁹po o le maualuga, po o le loloto, po o se tasi mea, ona faateaeeseina mai i tatou i le alofa o le Atua, o loo ia Keriso Iesu lo tatou Alii.

9 ¹O le upu moni ou te fai atu ai i luma o Keriso. Ou te le pepelo, ua molimau mai ia a'u lo'u loto fua ile Agaga Paia o loo i ai ia te au le faanoanoa tele ma le tiga e le aunoa i lo'u loto.² Auā ou te mafaia ona fia anatema o a'u ia te'a ma Keriso e sui a'i o'u uso, e lo'u aiga i la le tino. ³O sa Isaraelū i latou. O tamafai i latou, ua ia foi le mamalu, ma feagaiga, ma sauniga o le tulafono, ma le tapuaiga, ma upu na folafolaina. ⁴O ia te i latou tupuga mai ia te i latou foi le Keriso i la le tino, o lē pule aoao ia, o le Atua e viia e faavavau. Amene. ⁵Ae le peiseai ua iu vale le afioga a le Atua. Auā o tagata mai ia Isaraelu, e le o Isaraelu i latou uma lava. ⁶E lē o suli uma foi o Aperaa mo o ana fanau moni fo'i. Ae peitai, "O le a valaauina au fanau, e ala mai ia Isaako." ⁷O lona uiga lenei, o le fanau a le tino, e le o fanau a le Atua i latou. Ae peitai o fanau o i le upu ua folafolaina, e ta'ua i latou o le fanau/suli. ⁸Auā o lenei le upu na folafolaina: " O faapenei i le la tausaga, ou te sau ai, e maua foi e Sara sana tama tane." ⁹E le na o lea, a ua to foi Repeka i le tasi, o lo matou tamā o Isaako lea; ¹⁰ao lei fanau mai ana tama, a o lei fai foi e i laua se mea lelei, poo se mea leaga, ina ia tumau le finagalo o le Atua i la le filifiliga, ¹¹e le ona o galuega, a ona o le na valaau mai - na fetalai atu ai te ia, "E auauna le ulumatua i le uii." ¹²E pei ona tusia: "Ua ou alofa ia Iakopo, a ua ou 'inoia ia Esau."¹³ O lenei, o le a ea sa matou upu o le a fai atu? O iai ea le amiloletonu i le Atua? Aua nei faapea. ¹⁴Auā na ia fetalai atu ia Mose, "Ou te alofa atu i le ou te fia alofa atu iai, ou te alofa mutimutivale foi i le ou te fia alofa mutimutivale i ai." ¹⁵O lenei, e le mai le ua manao, e le mai le ua tausinio, poo lē a e mai le Atua o lē alofa mutimutivale. ¹⁶Auā ua faapea mai le tusi ia Farao, "O lenei lava le mea ua ou faatu ai ia te oe, ina ia ou faaalua lo'u mana ia te oe, ina ia ta'ua foi lo'u igoa i le lalolagi uma lava." ¹⁷O lenei, e alofa ia i le ua ia finagalo i ai; a e faamaaa e ia i le ua ia finagalo i ai. ¹⁸Ona e fai mai lea ia te a'u, " Aisea le mea e saili ai pea o ia? O ai ea e tetee atu i lona finagalo?" ¹⁹Nai lo lea, le tagata e, o ai ea oe e te tali atu ai i le Atua? E fai atu ea le mea ua liuina i lē na te faia, "Se a le mea ua e faia ai faapea iā te a'u?" ²⁰Pe e lē pule ea le fai ipu o mea i le omea e fai ai i le paluga e tasi o le tasi ipu o le mea lelei, ao le tasi o le mea faatauvaa? ²¹Afai ua onosai le Atua, ma ua matuā faapalepale i ipu o le toasa ua faatatauina i le malaia, ina ua finagalo o ia e faaali mai ai lona toasa, ma faailoa mai ai lona mana? ²²Ae faapefea pe afai na te faia lenei mea ina ia mafai ona ia faailoa atu le oa o lona mamalu i luga o ipu o le alofa mutimutivale, lea na ia saunia muamua mo le mamalu? ²³Ae fa'apefea pe 'afai na ia faia fo'i lenei mea mo i tatou, o ē na vala'auina fo'i e ia, e lē gata i tagata Iutaia, ae ato'a fo'i ma tagata o Nuu ese? ²⁴E pei ona fetalai mai o ia i le Hosea, " O le a ou ta'ua ou tagata/nuu e le o ni o'u tagata/so'u nuu, o lē ua alofaina sa le alofaina. ²⁵O le mea fo'i lea na fai atu ai 'iā te i latou, E lē o so'u nu'u 'outou, ona ta'ua ai lea o i latou o atalii o le Atua soifua." ²⁶Ua alaga foi Isaia ia Isaraelu, "E ui lava ina faapei o le oneone i le sami le toatele o le fanauga a Isaraelu, e faaolaina e ua totoe, ²⁷auā o le a faataunuua lava e Ieova lana afioga i le lalolagi atoa ma le lē faatuai". ²⁸E pei ona fai mai foi anamua o Isaia, "Ana le faatotoeina e le Alii o Sapaota ni fanau mo i tatou, poo ua avea i tatou e pei o Sotoma, ma faatatauina i tatou i Koromo." ²⁹O lenei, o le a ea sa tatou upu? Ua maua le amio tonu e Nuu ese, na latou saili i le amiotonu, ole amiotonu lava lea e maua i le faatuatua. ³⁰A o Isaraelu, na saili ile tulafono o le amiotonu, e lei oo i latou i le tulafono o le amiotonu. ³¹Aisea e le fai ai? Aua latou te le i sailia i le faatuatua ae peiseai o galuega. Auā na latou tausui i le maa e tausui ai., ³²e pei ona tusia, "Faauta ou te tuu i Siona le maa e tausui ai, ma le papa e tautevateva ai, e le mā foi se tasi e faatuatua ia te ia."

10 ¹Le au uso e, o le manao o lo'u loto ma la'u tatalo i le Atua mo Isaraelu, ina ia maua e i latou o le faaolataga. ²Aua oute molimau atu ia i latou e i ai lo latou naunautaiga i le Atua, ae lei so latou malamalama. ³Aua o le le malamalama i le amiotonu e mai le Atua, ma latou saili ina ia galueina la latou lava amiotonu, ua latou le talia ai le amiotonu a le Atua. ⁴O Keriso le atoaga o le tulafono mo le amiotonu o i latou uma o e talitonu. ⁵Aua na tusi e Mose o le amiotonu e maua i le tulafono. O le tagata na te usitaia e ola ai o ia". ⁶A o le amiotonu e maua i le faatuatua e faapea ane; "Aua e te fai ifo i lou loto, "O ai o le a alu a'e i le lagi" (o lona uiga ua faapea atu ina ia auina mai Keriso i lalo). ⁷Aua fo'i le faapea ane, "O ai se alu ifo i le mea maualalo?" (o lona uiga ua faapea atu ina ia auina a'e o Keriso nai e ua oti). ⁸A o le a le mea o fai mai ai?. "O lo o latalata mai ia te oe le Upu, i lou gutu ma lou loto". O le Upu lena o le faatuatua o lo o matou tala'i atu. ⁹Afai e te tautino i lou gutu o Iesu o le Alii, ma e talitonu i lou loto na toe faatuina mai e le Atua Iesu mai le oti, e faaolaina ai oe. ¹⁰Aua o le loto e talitonu ai, e oo mai ai le amiotonu, a o le gutu e tautino ai e oo mai ai le ola. ¹¹Aua ua faapea mai le Tusi "O i latou uma o talitonu ia te Ia e le faamaina i latou". ¹²Aua e lei se eseese i le Iutaia ma le Eleni, aua o le Alii e toatasi o tagata uma, ma e tele lona alofa ia i latou uma e valaau atu ia te Ia. ¹³Aua o i latou uma e valaau atu i le Suafa o le Alii e faaolaina i latou. ¹⁴E faapefea ona latou valaau atu ia te Ia, ae latou te le talitonu i ai?. E faapefea ona latou faatuatua ia te

Ia, ae latou te le i faalogo faatasi i ai?. E faafefea ona latou iloa pe afai e leai se tasi na ia faailoa atu ia te i latou? ¹⁵E faafefea ona latou tala'i atu, ae seiloga e auina atu?. - E pei ona tusia, "E ese le matagofie o vae o i latou e tala'i atu le Talalelei." ¹⁶Ae e le i usitaia e i latou uma le Talalelei. Aua ua fai mai Isaia, "Le Alii o ai ea ua talitonu i la matou Upu e tauologologo atu. ¹⁷"E tupu mai le faatuatua i le faalogo, o le faalogo fo'i i le Upu a Keriso ¹⁸Ae oute fai atu "Latou te le i lagona?" O lea lava. "Ua oo atu lo latou leo i atunuu uma, ma a latou Upu ua oo atu i soo se itu o le lalolagi" ¹⁹Ae oute fai atu "Pe na le i iloa ea e Isaraelu". Na muai fai mai Mose "Oute faatupu lou loto tiga i se mea e le o se Nuu. Ae foliga mai o se Nuu e leai sona malamalama, ma oute faatupu fo'i i ai lou ita" ²⁰Na matua lototele lava Isaia ina ua fai mai, "Na maua a'u e i latou e le i sailia mai a'u. Na ou faaali atu ia i latou e le i mananao mai ia te a'u." ²¹Ae ua fai atu o Ia ia Isaraelu, "O aso uma e aapa atu ai o'u lima i se nuu faalogogata ma le loto maaa o ona tagata"

11

¹Oute faapea atu, na tuulafoa'i e le Atua ona tagata? Aua ne'i faapea. Aua o a'u o le Isaraelu, o le suli o Aperaa, o le ituaiga a Peniamina ²E le i tuulafoa'ina e le Atua ona tagata, na ia iloa mai anamua. Tou te le o iloa ea le tala a le tusi ia Elia, i lona molia o Isaraelu i le Atua? ³"Le Alii e, ua latou fasioti au perofeta, ua latou faaleagaina au fata faitaulaga. Ua na o a'u o totoe, ma o lo o latou saili fo'ie fasioti ia te a'u." ⁴Ae o le a le tali a le Atua ia te ia?. "Ua ou tuuea mo a'u tagata e fitu afe, o i latou e le i ifo faatasi atu ia Paala". ⁵E ui i lea, e oo mai i le taimi nei, e i ai lava lelei o totoe ona o le filifiliga i le alofa tunoa. ⁶Ae afai o le alofa tunoa, o lona uiga e le o toe fua faatatauina i galuega. Ne i le toe avea le alofa tunoa o se alofa tunoa. ⁷O le a la?. O le mea o saili e Isaraelu, latou te le o maua, a o latou na filifilia ua latou maua, ae ua faamaaaina le tele o i latou. ⁸E pei ona tusia: "Ua tuuina atu e le Atua ia i latou le agaga o le matamoe, e i ai mata ae le vaai, e i ai taliga ae le lagona seia oo mai i le aso" ⁹Ona fai mai lea o Tavita, "Ia avea la latou laulau 'ai ma mailei, o se togafiti, ma ni mea faigata e fai ma tau mo i latou. ¹⁰Ia faapogisaina o latou mata, ia latou le iloa, ina ia fa'aaau ai pea ona latou savavali ma o latou tua e faano'uno'u" ¹¹Oute faapea atu, "Na lavelavea i latou ma oo ina pa'u'u?" Talosia ia aua ne'i faapea. Ae ia avea la latou agasala, e fai ma auala e oo atu ai le faaolataga i nuuese, ma ia faalotoleagaina ai i latou. ¹²Afai o le latou agasala ua faatamaoagaina ai nuuese, po o le a se matautia o le manuia e oo ia i tatou pe ana latou taliaina le folafolaga. ¹³A o lenei o le a ou talanoa atu ia te outou nuuese, o le a lava le umi e avea ai a'u ma aposetolo i nuuese, oute mitamita lava i la'u galuega. ¹⁴Ma oute faatupuina le loto leaga ia i latou o lo'u lava tino. Ma tatou faaolaina nisi o i latou. ¹⁵Aua afai o le teenaina o i latou ua fai lea ma faaleleiga mo le lalolagi, pe faafefea pe ana taliaina e i latou i le ola mai le oti?. ¹⁶Afai o ulua'i fua e paia, e faapea fo'i le laau atoa. Afai e paia a'a, e faapena fo'i i lala. ¹⁷Ae afai ua gau nisi o lala, afai o oe o le lala olive vao, ua faapiiina mai oe ia i latou, ma ua e maua faatasi ma i latou le manuia mai le aa o le laau o le olive. ¹⁸Aua e te manatu faamaualuga i ona la. Ae afai e te manatu faamaualuga, e le o oe ua mafua ai le manuia o aa, ae o le aa ua e manuia ai. ¹⁹E te faapea ifo, "Na gauia lala ina ia mafai ona faapii atu a'u." ²⁰E moni, ona o lo latou le talitonu na gausia ai i latou, ae na faatumauiina oe ona o lou faatuatua. Aua e te faamaualuga i ou manatu, a ia e mata'u. ²¹Aua afai e le i faasaoina e le Atua lala moni, e le faigata fo'i ona le faasaoina oe. ²²Ia outou iloa lelei le agaaloa ma le toasa o le Atua: na oo mai lona toasa i le 'au Iutaia na pa'u'u, ae na oo mai lona agaaloa i luga o outou, pe a outou tumau i lona alofa. Aua a leai, e faapea fo'i ona tipina ese outou. ²³E oo fo'i ia i latou, afai latou te le tumau ai pea i le le talitonu, e toe faapiiina mai i latou. Aua e mafai e le Atua ona toe faapiiina mai i latou. ²⁴Aua afai na sala'eseina mai outou mai i le olive vao, ma faapiiina atu outou i le olive moni, e le faigata ona toe faapiiina mai lala o le olive moni. ²⁵O'u uso e, oute le manao ina ia outou le iloa lenei mea lilo, ina ia outou le atamamai i o outou manatunatuga: Ua oo mai le faamaaaina o loto o nisi o Isaraelu, ina ia mafai ona ulufale uma mai le numera atoa o nuuese. ²⁶Ona faaolaina uma lea o Isarelu, e pei ona tusia: "E sau mai Siona le Faaola. O le a ia aveesea le amioletonu mai ia Iakopo, ²⁷o La'u feagaiga lea ma i latou, ina ua ou aveesea a latou agasala." ²⁸E tusa ai ma le faamoemoe o le talalelei, o i latou o fili mo lou lelei. Ae tusa ai ma le faamoemoe o le filifiliga, e alofaina i latou ona o o latou tuua. ²⁹Aua o meaaloa ma le valaau a le Atua e le mafai ona toe suia. ³⁰Aua sa outou faalogogata i le Atua, a o lenei ua outou maua le alofa mutimutivale ona o lo latou faalogogata. ³¹O le ala lava lea e tasi aua ua faalogogata Iutaia. E i'u ina faaalua lea alofa mutimutivale ia i latou, e pei ona sa faaali atu ia te outou. ³²Aua ua avea e le Atua le faalogogata o tagata uma, e fai ma mea e faaalua ai lona alofa mutimutivale i tagata uma. ³³Aue, i le loloto ma le oa o le pota ma le malamalama o le Atua! E mafai faafefea ona fesiligia ana faamasinoga, aua e le mafai ona tatou iloa ona ala! ³⁴Aua o ai ua ia iloa le manatu o le Alii, po o le ua avea ma ana faufautua? ³⁵Po o ai ua ia muamua foa'i se mea i le Atua, e tataui i le Atua ona toe totogi?. ³⁶Aua o mea uma e aumai ia te Ia, e ui atu ia te Ia, ua ia te Ia fo'i mea uma. Ia ia te Ia le viiga e faavavau lava. Amene.

12 ¹O lenei au uso e, ou te aoi au ia te outou, ona o le alofa mutimutivale o le Atua, ia outou tuuina o outou tino e avea ma taulaga ola, e paia ma talia e le Atua. O le mea lea e tataui ai ona outou faia. ²Aua foi tou te amio faatasi ma lenei lalolagi, ae peitai ia liliuina ile toe fuataiina o outou mafaufau. Ia outou fai lenei mea ina ia outou suesue ma faamaonia pe se a le finagalo ole Atua, o mea ua lelei, ma le mālīe/ma taliaina ma le atoatoa. ³Aua o le alofa tunoa na tuuina mai ia te a'u, ou te fai atu ai ia te outou: aua le faasili le manatu o se tasi i le mea ua tataui ona manatu ai, a ia māmā le manatu ia tusa ma le tofiga o le faatuatua ua taitasi ma tuuina mai e le Atua/tofu ai mai le Atua. ⁴Auā faapei o itu tino e tele i le tino e tasi, a e le tasi se faiva i itu tino uma. ⁵I le itu lava e tasi, o tatou e toatele, e tasi lava le tino o Keriso, ae o tatou foi o tagata taitoatasi o le tasi ma le isi. ⁶E eseese foi a tatou meaaloa na tuuina mai i le alofa tunoa. O le tasi meaaloa o le perofeta, ua faatauina mai le tofi o le faatuatua. ⁷Afai ole meaaloa a le tasi o le auaunaga, ia tuu atu ia te ia e auauana. Afai o le

meaalofa a le tasi o le aoao atu, ia tuu ia te ia e aoao atu. ⁸Afai o le meaalofa a le tasi o le apoapoai, ia apoapoai o ia. Afai o le meaalofa a le tasi o le foai mea, ia faia ma le matamau. Afai o le meaalofa a le tasi o le taitai, ia taitai ma le filigā. Afai o le meaalofa a le tasi o le faailoa o le alofa mutimutivale, ia faia ma le loto fiafia. ⁹Aua nei faatagā alofa. Ia inoino i le leaga; ia pipii i le lelei. ¹⁰Ia fefaapelepeleai i le fealofani o uso; ia tausolomua ona ava o le tasi i le tasi. ¹¹Aua le faavaivai, i le filigā, ia malosi le loto. E uiga i le agaga, ia naunau. E uiga i le Alia, ia auauna ia te ia. ¹²Ia olioli i le faamoemoe, ia onosai i le puapuaga, ia finafinau i le tatalo. ¹³Ia tufatufa atu ni a outou mea i le mativa o le au paia. Ia tausisi i le alofa i tagata ese. ¹⁴Ia faamanuia atu i e faasaua mai ia te outou; ia faamanuia lava, a e aua le fetuu. ¹⁵Ia outou olioli faatasi ma e ua olioli, ia ouotu tagi faatasi ma e ua fetagisi. ¹⁶Ia gatasitasi o outou manatu. Aua le manatu i mea silisili, a ia feoi ma e ua faamaualalo. Aua le faafiapoto. ¹⁷Aua le tau i le leaga i le leaga. Ia sauniuni mea e tusa i luma o tagata uma lava. ¹⁸Afai e mafaia e outou, ia outou nofo lelei /ola filemu ma tagata uma lava. ¹⁹Le au pele e, aua le tau atu ma sui, a ia outou tuu atu i le toasa o le Atua. Auā ua tusia, "Ua faapea mai le Alii, O ia te a'u le tau ma sui, ou te tau atu. ²⁰O lenei, a matelaina le ua ita mai ia te oe, fafaga ia te ia; a fia inu ia, avatu ia te ia e inu ai; auā o le amio faapea e faafaupue ai malala ola i luga i lona ulu." ²¹Aua le faatoilaloina oe i le leaga, a ia faatoilaloina le leaga i le lelei.

13 ¹Ia usiuitai tagata uma i faipule silisili, auā e leai se pule pe a lē mai le Atua. O pule o loo iai ua tofia e le Atua. ²O lea o ia o lē e fouvale faasaga i lena pule ua tetee atu o ia i le poloaiga a le Atua; o i latou fo'i e tetee i ai, e fa'amasinoina i latou lava. ³Auā o alii/faipule e lē o se faamataui i latou i ē fai amio lelei, a o ē amio leaga. E te le manao ea e te lē fefe i lē ua iai le pule? Fai le mea e lelei, ona e maua ai lea o lona viiga. ⁴Auā o ia o le auauna a le Atua ia te outou mo le lelei. Ae afai e te faia le amio leaga, ia e fefe ai; auā e lē ave fua e ia le pelu. Auā o ia o le auauna a le Atua, o lē na te tau ma sui le toasa i lē ua fai mea leaga. ⁵O le mea lea e tatau ai ona outou gauai, e lē gata ona o le ita, ae ona o le lotofuatiaifo foi. ⁶O le mea foi lea tou te totogi ai lafoga. Auā o ē pule, o auauna ia a le Atua, o ē tausisi i lenei lava mea e lē aunoa. ⁷Ia outou totogi atu ia te i latou taitoatasi le mea e tatau ia te i latou; ⁸Aua nei outou aitalafu se mea i se isi lava, tau lava o le alofa o le tasi i le isi. Auā o lē e alofa i lē lua te tuaoi, ua faataunuaina e ia le tulafono. ⁹O poloaiga foi, "Aua e te mulilua, aua le fasioti tagata, aua le gaoi, aua le matapeapea; afai foi e i ai se isi poloaiga, o lona aotelega lenei, "Ia e alofa atu i lē lua te tuaoi e pei o oe lava ia te oe." ¹⁰E lē agaleaga le alofa i lē lua te tuaoi. O le mea lea, o le alofa o le faataunuaina lea o le tulafono. ¹¹O le mea lea, ua outou iloa ai le taimi, ua o'o nei i le itula e ala ai e na momoe. Auā ua latalata mai lo tatou faaolataga i le taimi na tatou uluai faatuatua ai. ¹²Ua alu atu le pō, ua lata mai fo'i le ao. O lenei, ia tatou tuu ese galuega a le pouliuli, a ia tatou oofu i ofutau o le malamalama. ¹³Ia tatou savavali ma le tatau, e pei o le ao, aua le poula po o le onā; aua fo'i nei o tatou savavali i le faitaaga, po o le tuinanau lē pulea, aua foi le misa ma le fuā. ¹⁴A ia ofu i le Alii o Iesu Keriso, aua foi nei sauni le tino e faamalie ai ona tuinanau.

14 ¹Ia outou talia le ua vaivai i le faatuatua, a ele ina ia faamasinoina o masalosalo. ²O le taofi o le tasi e 'aina mea uma lava; e 'aina e le ua vaivai na o mea e tutupu i le laueleele. ³Aua nei tau faatauvaaina lē 'ai meaai uma ma le ua le 'ai, auā ne'i ave lē e lē 'ai mea uma e faamasino atu i le ua 'ai. Auā ua talia o ia e le Atua. ⁴O ai ea oe, o oe lē faasala atu i le auauna a le tasi? E tumau ia pe paū i lona lava alii. Ae faatumauina lava ia, auā e mafaia e le Atua ona faatumau ia te ia. ⁵O le tasi tagata, e manatu e sili le tasi aso ile tasi aso. Ao le manatu o le isi, ua tutusa aso uma lava. Ia taitoatasi ma talitunuina lona lava mafaufau. ⁶O lē na te tausia le aso, na te tausia mo le Alii; ao lē e 'ai, e 'ai mo le Alii, ua na avatu le faafetai i le Atua. Ao ia ua le 'ai, ua ia alo ese mai le 'ai mo le Alii; ua ia faafetaia foi le Atua. ⁷Aua e leai se tasi o i tatou e ola mo ia lava, e le oti foi se tasi mo ia lava. ⁸Auā afai tatou te ola, tatou te ola mo le Alii, pe afai tatou te oti, tatou te oti mo le Alii. ⁹Auā o le mea lava lea na malui ai Keriso, ma ua toe tu mai ai, ma ua soifua ai, ina ia faia o ia ma Alii mo e ua oti atoa ma e o la. ¹⁰Ae o oe na, aisea e te faamasino ai lou uso? Ma oe lena, aisea e te inoino ai i lou uso? Auā tatou te tutu uma lava i luma o le nofoa faamasino o le Atua. ¹¹Auā ua tusia, "Ou te ola a'u," ua fetalai mai ai le Alii, "e tootuli tulivae uma lava ia te a'u, ma laulaufaiva uma lava e tatau le Atua." ¹²O lenei, e taitasi i tatou ma tala i lana amio i le Atua. ¹³O lenei, aua nei faamasinoina e le tasi le tasi, ae ia filifili le mea lea, aua nei tuu ane e se tasi se mea e tausui ai, poo se mea e tautevateva ai lona uso. ¹⁴Ua ou iloa ma ou mautinoa ile Alii o Iesu, e leai se mea e leaga na o ia. Ua na o ia ua manatu ua leaga le mea, ona leaga ai lea ia te ia. ¹⁵A e afai e faatigaina lou uso i au mea e 'ai, ua e le toe amio alofa. Aua le fano i au mea e 'ai, auā o ia na malui ai Keriso. ¹⁶O lenei, aua nei ta'u leagaina lo outou lelei. ¹⁷Auā o le malo ole Atua, e le o mea e 'ai ma mea e inu; ao le amiotonu ma le filemu, ma le olioli il e Agaga Paia. ¹⁸Auā o le ua auauna atu ia Keriso i ia mea, ua fiafia i ai le Atua, ua ta'uleleia foi o ia e tagata. ¹⁹O lenei, ia tatou tausisi i mea e tupu ai le filemu, ma mea e fefaamafanafanai. ²⁰Aua le lepetia/faaleaga le galuega a le Atua ona o mea e ai. O mea uma e mamā, a e leaga le tagata i lē 'ai i soo se mea e ave ma mafuaaga e leaga ai se tasi. ²¹E lelei pe a aua le 'ai i aano o manu fasi, pe inu uaina, pe fai foi se mea e leaga ai lona uso. ²²O le faatuatua ua e maua, ia faatumauina ile va o oe ma le Atua. Amuia le ua lē faasalaina o ia e ia, i le mea ua manatu o ia e tatau. ²³Ao lē masalosalo, ua faasalaina ia pe afai e 'ai, auā e lē mai le faatuatua. Auā o mea uma e lē mai le faatuatua, o le agsala lea.

15 ¹O i tatou foi o ē malolosai, e tatau ona tatou onosai i vaivaiga o ē vaivai, ae lē tatau ona faafiafia i ai tatou lava. ²Ia tatou taitasi ma faafiafia i lē la te tuaoi mo le lelei, ina ia atiae ai o ia. ³Auā e oo lava ia Keriso e lei faafiafiaina o ia e ia. 'Ae e pei 'ona tusia, "Ua pa'u mai ia te a'u le tauemuga a ē na agaleaga mai ia te oe. ⁴Auā o mea uma foi na tusia muamua, na tusia ia e aoao mai ai ia te i tatou, ina ia tatou maua le faamoemoe i le onosai ma le faamafanafanaga mai i tusi. ⁵O lenei, ia foa'i atu e le Atua o le onosai ma le faamafanafanaga ia outou maua le loto gatasi e tusa ai ma Keriso Iesu. ⁶Ia faia

e ia lenei mea ina ia outou vivii atu ma le gutu e tasi i le Atua ma le Tamā o lo tatou Alii o Iesu Keriso, ma le manatu e tasi. ⁷O lenei, ia outou talia e le tasi le isi, faapei ona talia foi o outou e Keriso, ia viia ai le Atua. ⁸Auā ou te fai atu, ua avea Keriso ma auauna a le peritomeina ona o le upu moni a le Atua, ina ia faamaonia ai folafolaga na tuuina atu i augātāmā, ⁹ma ia vivii atu ai tagata o Nuū ese i le Atua ona o lona alofa mutimutivale. E pei ona tusia, “O le mea lea ou te vivii atu ai ia te oe i luma o Nuū ese, ma fai pesega i lou suafa.” ¹⁰Ua toe fai mai fo’i, “Ia olioli outou Nuū ese, faatasi ma lona nu’u.” ¹¹O lenei foi, “Ia vivii atu ia Ieova outou o nuū ese uma; ia vivii atu ia te ia o nuū uma lava.” ¹²Ua toe faapea mai foi Isaia, “E oo mai le aa o Iese, o le na tulai e pule i Nuū ese, e faamoemoe ia te ia o nuū ese.” ¹³O lenei, ia faatumuina outou e le Atua o le faamoemoe i le olioli uma ma le manuia i le faatuatua, ina ia faateleina ai lo outou faamoemoe i le mana o le Agaga Paia. ¹⁴Le au uso e, o a’u fo’i, ua ou talitonu ia te outou. Ua ou mautinoa, ua tumu foi outou i le agalelei, ua tumu i le poto uma lava. Ua ou mautinoa e mafai foi ona outou aoaoina e le tasi i le isi. ¹⁵A ua ou tusi atu ma le loto tele ia te outou i nisi o mea, ina ia toe faamanatu atu ia te outou, ona o le alofa tunoa na foaiina mai e le Atua ia te a’u. ¹⁶O le alofa tunoa lenei ina ia avea a’u ma auauna a Keriso Iesu, ua auina atu i Nuū ese, e fai ma ositaulaga o le Tala Lelei a le Atua, ina ia talia le taulaga a Nuū ese, ua faapaiaina e le Agaga Paia. ¹⁷O Keriso Iesu ua ou mitamita ai i la’u auaunaga i le Atua. ¹⁸Auā ou te lē mafai ona tautala atu i se mea sei vagana ai mea ua faia e Keriso ia te a’u, ina ia usiusitai ai Nuū ese. O mea ia ua faia i upu ma galuega, ¹⁹i le mana o faailoga ma vavega, ma le mana o le Agaga o le Atua. O le mea lea ina ia ou matuā faataunuuina ai le tala lelei ia Keriso, nai Ierusalemā, atoa ma Iluriko. ²⁰I lenei auala, o lo’u naunau e folafola atu le talalelei, ae le o le mea e iloa ai Keriso i lona suafa, ina ia ou le atiina ae i luga o le faavae o se tasi tagata. ²¹E pei ona tusia, “O ē e lei oo i ai se tala e uiga ia te ia, ma e e lei faalogo i ai, o le a latou malamalama/iloa o ia.” ²²O le mea lea na faalavelave ia te a’u i le tele o taimi sa le mafai ai ona ou alu atu ai ia te outou. ²³A o lenei, ua leai se mea e nonofo ai i nei nu’u, ma ua tele tausaga ua ou faanaunau/manao ai ou te alu atu ia te outou. ²⁴O lo’u faamoemoe tatou te feiloai pe a ou ui atu i Sepania, ma ia outou fesoasoani mai i la’u malaga, ma tatou fiafia faatasi ai mo sina taimi. ²⁵Ae mo le taimi nei, ou te alu i Ierusalemā, e auauna i le au paia a le Atua. ²⁶Auā ua loto Maketonia ma Akaia ina ia avatu se foai mo ē matitiva o le au paia a le Atua o i Ierusalemā. ²⁷Ioe, sa latou loto foi i ai, aua sa nofo aitalafu iā i latou. Auā afai ua tofusua tagata o Nuū ese i a latou mea faaleagaga, ua tataui i tagata Iutaia ona auauna ia te i latou i a latou mea faaletino. ²⁸O lenei, pe a uma ona faataunuuina lenei galuega, ma ua ou mautinoa ua maua e i latou mea uma na faaputuina, ona asia atu lea o outou, i le ala i Sepania. ²⁹Ua ou iloa pe a ou alu atu ia te outou, ou te alu atu ma le tumu o le manuia o Keriso. ³⁰Le au uso e, ou te aioi atu ia te outou i lo tatou Alii o Iesu Keriso, ma le alofa o le Agaga, ia outou finafinau faatasi ma a’u i a outou tatalo i le Atua mo a’u. ³¹Ia outou tatalo ina ia laveaiina a’u mai i ē lē usiusitai i Iutaia, ina ia talia foi e le au paia o le Atua la’u galuega mo Ierusalemā. ³²Ia outou tatalo ina ia ou alu atu ia te outou ma le olioli i le finagalo o le Atua, ina ia ou maua fo’i le malologa faatasi ma outou. ³³Ia ia te outou uma lava le Atua e ona le manuia. Amene.

16 ¹Ou te faailoa atu ia te outou lo tatou tuafafine ia Fipe, o le tiakono lea o le ekalesia i Kenikerea, ²ina ia talia o ia e outou i le Alii. Ia outou faia e tusa ma le amio e tataui i le au paia, ma ia fesoasoani atu ia te ia i so’o se mea e manaomia ai e ia ia outou fesoasoani, auā o ia sa fesoasoani tele mo le toatele o outou atoa ma a’u nei. ³Ua ou alofa atu ia Pisila na Akuila, na la faigaluega faatasi ma a’u i le galuega a Keriso Iesu ⁴o ē na tuuina atu o laua ola mo a’u. Ou te faafetai atu mo i laua, ua le na o a’u, ae faapea foi le ekalesia atoa i nuū ese. ⁵Ua ou alofa atu foi i le ekalesia o i lo laua fale. Ua ou alofa atu ia Epaineto la’u pele, o le ulua’i fua (fa’apolopolo) o ia ia Keriso i Akaia. ⁶Ua ou alofa atu ia Maria, o le na galue tele mo outou. ⁷Ua ou alofa atu ia Aneroniko ma Iunia, o o’u aiga sa matou fa’atasi ma a’u i le falepuipui. Ua logoleleia i laua i aposetolo, sa la i ai ia Keriso e muamua ia te au. ⁸Ua ou alofa tu ia Amepelia, o la’u pele i le Alii. ⁹Ua ou alofa atu ia Upano, o le uso a auauna ia Keriso, ma Sataku la’u pele. ¹⁰Ua ou alofa atu ia Apele, ua ta’uleleia o ia ia Keriso. Ua ou alofa atu i sa Arisopolō. ¹¹Ua ou alofa atu ia Herotiona, ma te aiga. Ua ou alofa atu i e o sa Makiso, o ē ua i le Alii. ¹²Ua ou alofa atu ia Tufaina ma Tufosa, o fafine na galulue i la le Alii. Ua ou alofa atu ia Peseti, o le pele, o le na galue tele i la le Alii. ¹³Ua ou alofa atu ia Rufo, na filifilia e le Alii, i le ma lona tinā, o lo’u tinā foi lea. ¹⁴Ua ou alofa atu ia Asugerito, ma Fegona, ma Herema, ma Pateropa, ma Heremea, ma le au uso o ia te i latou. ¹⁵Ua ou alofa atu ia Filoloko ma Iulia, o Nereu foi ma lona tuafafine, ma Olumepa, ma le au paia atoa uma o ia te i latou. ¹⁶Ia outou fealofani i le feasogi paia. O loo alolofa atu ia te outou ekalesia uma a Keriso. ¹⁷O lenei, ou te aioi atu ia te outou, le au uso e, ia outou vaavaai i ē faatupu fevaevaeai, ma mea e tausuai ai, o mea e le tusa ma le mataupu ua a’oa’oina ai outou, ia outou liliu ese foi ia te i latou. ¹⁸Auā o ē faapea, e le auauna i latou i lo tatou Alii o Iesu Keriso, ao latou lava manava; ma latou faasese i loto o tagata ua le manatu leaga, i lo latou faaneene ma alofa fa’avivii. ¹⁹Auā ua logo atu lo outou usiusitai e fai ma faataitaiga i tagata uma lava; o lea ou te olioli ai ona o outou. Ou te manao foi ia popoto outou i mea lelei, a ia valelea i mea leaga. ²⁰O le Atua foi o le filemu na te nutipalaina Satani i lalo o outou vae. Ia ia te outou le alofa tunoa o lo tatou Alii o Iesu Keriso. ²¹O lo alofa atu ia te outou Timoteo, ma te galulue faatasi ma a’u, ma Lukio, ma Iasona ma Sosepatero, o o’u aiga i latou. ²²O a’u nei o Tesio, o le ua tusi lenei tusi, ua ou alofa tu ia te outou i la le Alii. ²³O loo alofa atu ia te outou Kaio, o lē talia a’u ma le ekalesia uma. O loo alolofa atu ia te outou Erato, o le teutupe o le aai, ma Kuato lona uso. ²⁴Ia ia te outou uma lava le alofa tunoa o lo tatou Alii o Iesu Keriso. Amene. ²⁵Ia viia le na te mafaia ona faatumaui ia te outou, e tusa ma la’u talalelei, ma le talaiga o le tala ia Iesu Keriso, e tusa ma le faaliga o le mea lilo sa natia i tausaga o le vavau; ²⁶a ua faaali mai nei i tusi a perofeta, e tusa ma le poloaiga a le Atua e faavavau, o loo ua faailoa mai i nuū uma, ia iu ina usiusitai i le faatuatua. ²⁷Ia i le Atua poto e toatasi le viiga e faavavau, e ala atu ia Iesu Keriso. Amene.